

---

---

## ԲՈՒԺՈՂԻ ԿԵՐՊԱՐԸ ՀԱՅԿԱԿԱՆ ՀԵՔԻԱԹՆԵՐՈՒՄ

### ԵՎ ԱԶԱՔԱՐՅԱԼ

Հայկական հեքիաթներում հաճախ է պատահում, որ հերոսներից մեկին պատուհասում է հիվանդությունը, և հարկ է լինում դիմել բուժողի օգնությանը: Բուժողի մասին պատկերացումները հեքիաթում առանձնապես չեն շեղվում միջնադարյան բժիշկների կերպարը բնութագրող հատկանշական գծերից, որոնցով նրանք առանձնանում, յուրահատուկ տեղ են գրավում այլ մասնագիտություն ունեցող անձանց մեջ:

Ո՞վ է նա՝ բժիշկ, թե՞ դոքթոր, Լոդմանի՞, թե՞ հեքիմ, շամանական հատկություններ ունեցող կախա՞րդ, թե՞ գուշակ, թուղթ գցող՞ դ, թե՞ գրբաց, օձ պարեցնող՞, թե՞ ֆալսի, դերվիշ՞, թե՞ տատմեր, տերտե՞ր, թե՞ իմաստուն: Նա հայտնվում է մարդու համար ճգնաժամային պահերին և կոչվ տալիս նրա կյանքին սպառնացող չար ուժերի դեմ, օգնության հասնում ծննդկան կնոջը, բերկրանք սպրում նորածին մանկան ճիշդ լսելիս և տխրում՝ անհույս հիվանդի հոգեվարքի ուղեկիցը դառնալով: Ականատես է լինում ծնողական երջանկությունը չվայելած, ամուլ ամուսինների տրտմությանը և ջանում օգնել նրանց, ծերացած արքաներին վերադարձնում է երիտասարդությունը, խեղված, մասնատված մարմինները փորձում կյանքի կոչել, օգնում է այլանդակված, վերքոտ հիվանդներին, որոնցից բոլորը զգվանքով փախչում են: Նա ազատ էլումուտ է անում տները, տեղեկանում մարդկանց ամենաձածուկ, մտերմիկ գաղտնիքներին, շահում նրանց վստահությունը, սեղան նստում տիրակալների հետ, դառնում նրանց կանանց ու աղջիկների հավատարիմ մարդը<sup>1</sup>, միջամտում անձնական հարցերին, օգնում հասնել սրտի ուզածին, երբեմն մասնակից դառնում նրանց խարդավանքներին: Հիվանդի սահմանային իրավիճակներում բուժողի ներկայությունը, տարիք ու սեռ, սոցիալական կարգավիճակ չճանաչող շփումները նրան դնում

---

<sup>1</sup> Հերոդոտը պատմում է հույն մի հայտնի բժշկի՝ Դեմոկրեսի մասին, որը գերի էր պարսիկների մոտ, ցնցոտիների մեջ, շղթայակապ: Դարեհ արքայի ոտքը ոլորվել էր, նա տառապում էր ցավից, քնել չէր կարողանում: Նրան բուժող եգիպտացի բժիշկներին չէր հաջողվում հողախախտումը տեղը գցել: Լսելով հույն բժշկի մասին՝ Դարեհը նրան բերել է տալիս: Բժիշկը սկզբում չէր ուզում բացահայտվել, սակայն մտրակների ու խայթողների միջոցով ստիպում են, որ խոստովանի իր բժիշկ լինելը: Հույն բժիշկը արագորեն բուժում է Դարեհ արքային: Դարեհի կանայք նրան առատ ոսկի են տալիս, Դարեհը նվիրում է մի հսկա, շքեղ տուն և դարձնում իր սեղանակիցը: Նրան ամեն ինչ թույլատրված էր, բացի Հելլադա վերադառնալուց: Նա փրկում է եգիպտացի բժիշկներին, որոնք հույն բժշկից պարտված լինելու համար դատապարտված էին ցցահան արվելու: Հույն բժիշկը մեծագույն հեղինակություն էր արքայի մոտ: Նա բուժում է նաև Դարեհի կնոջ կրծքի վերքը և խոստանում գաղտնի պահել այդ, փոխարենը խնդրում է կնոջը, որ Դարեհին մղի Հելլադա լրտեսական նավ ուղարկել, որով էլ կարողանում է փախչել ու վերադառնալ իր հայրենի քաղաքը (տե՛ս Հերոդոտ III, 129–132):

են աշխարհիկ սոցիալական կառուցվածքից դուրս վիճակում<sup>2</sup>: Բուժողը, ինչպես և շամանն ու մարգարեն, ունի, այսպես կոչված, «անկարգավիճակ կարգավիճակ»: Այդ առումով նա նմանվում է տարիքային անցումային ծեսերի (ինիցիացիա) նվիրագործող ծիսարարին, որն ապահովում է հասարակության նոր անդամների հոգևոր, ֆիզիկական հավասարակշռությունը՝ դրան հասնելու համար նրանց հասու դարձնելով բոլոր շերտերի, բոլոր խավերի ապրումներին:

Հեքիաթում հեքիմ է անվանվում իմաստունը, որի մոտ թագավորը տանում է իր որդուն դասեր առնելու՝ հետագայում գահը ժառանգելուն պատրաստ լինելու համար: Մակայն պետք է նկատի առնենք այն, որ հեքիմ-բուժող իմաստափոխությունը տեղի է ունեցել հենց այն պատճառով, որ հմայական հատկություններ ունեցող, պայծառասու մարդիկ հնում կոչվել են տեսանողներ և իմաստուններ, ու հենց նրանք էլ իրագործել են բոլոր ծեսերը, այդ թվում՝ գուշակությունը և բուժման ծեսը<sup>3</sup>: Մինևույն անձի բազմակողմանիությունը հատուկ է եղել հնում: Հիշյալ հեքիաթում հեքիմը առաջին օրը թագավորի որդուց խլում է հացը և թողնում նրան քաղցած: Երկրորդ օրը փակում է մի մութ սենյակում, երրորդ օրը՝ ծեծում: Եվ երբ թագավորը բողոքում է, հեքիմն ասում է, որ նա թագավոր է դառնալու, եթե չիմանա, թե սովը, անազատ վիճակը, ծեծը ինչ են, ինչպե՞ս ճիշտ դատի, արդարամիտ լինի. «Էփօր մեզը գար, թէ ինձի նահախ տեղը ծեծեցին, մեզայր թէ՛ անօթի եմ, օղորմութեն էրէ, – տրդադ ի նչրդ պիտի անոնց հալը հասկրնար, էփօր ինքը չըգիտէնար, թէ ծեծն ի նչ է, հափսն (բանտ – Եվա Չ.) ի նչ է, անօթութենն ի նչ է»<sup>4</sup>: Դրանք են կյանքի առաջին, ամենակարևոր դասերը:

Բժշկները, ինչպես և ցանկացած մասնագետները, կարող են լինել լավ ու վատ, հմուտ ու անճարակ: Հեքիաթում բժշկի անճարակության պատճառները հաճախ գալիս են այն նպատակներից, որ դրված է հեքիաթում. եթե հիվանդությունն այն առիթն է, որը հերոսին մղում է գնալ փորձությունների և քաջագործություններ կատարելով բերել բուժման հրաշագործ միջոցը, հետևաբար, այստեղ բժիշկն անելիք չունի, նա ի վիճակի չի լինելու բուժել հիվանդին, և ամենաշատը, որ կարող է անել, հիվանդության ճարը՝ բուժամիջոցն առաջարկելն է: Այսպես, կույր թագավորի աչքերը բուժելու համար Լողմա հեքիմը տարիներով անօգուտ չարչարվում է, մինչդեռ բուժման միջոցը՝ ծովի միջի Ոսկե ձուկը, բերում է որդին և բուժում հոր աչքերը<sup>5</sup>:

Բժշկի՝ ամեն տուն ազատ մուտք ունենալու հնարավորությունից օգտվելու համար հեքիաթի հերոսը երբեմն հեքիմ է դառնում կամ ձևանում՝ իր նպատակների հասնելու համար: Այսպես, հրաշագործ օգնականը՝ «ծերունի բաբանը», հերոսին շշուկ յուղ է տալիս, որով նա բուժում է հիվանդ թագավորին, ձեռք բերում վերջինիս վստահությունը, ազատ էլումուտ անում նրա տուն և կարողա-

<sup>2</sup> В. Т э р н е р. Символ и ритуал. М., 1983, с. 188.

<sup>3</sup> Ջ. Ֆրեդրիկս, Ոսկե ձուկը, Երևան, 1989, էջ 108–111:

<sup>4</sup> Ստ. Մ ա լ խ ա ս ս յ ա ն ց. Առակներ, ավանդություններ, անեկդոտներ, Երևան, 1958, էջ 47–48:

<sup>5</sup> Հայ ժողովրդական հեքիաթներ (այսուհետև՝ ՀԺՀ), հ. II, Երևան, 1959, էջ 39–49:

նում փախցնել դասերը<sup>6</sup>: Այլ տեղ Շիրին Շահն է հեքիմ դառնում, բուժում թագավորի հիվանդ որդուն, այդպես մուտք գործում Քաջանց թագավորի պալատ ու փախցնում նրա դասերը<sup>7</sup>: Հեքիաթում, ինչպես նաև իրական կյանքում, բուժողը ամենամեծ պարգևներն է ստանում, մինչդեռ ձախողման դեպքում՝ հատուցում կյանքով. «Թեկեր աղջիկս լավցուցիր, ինչ օր ուզես կուտամ կը, թե չը լավցուցիր՝ գլոխդ կոռեմ կը»<sup>8</sup>: Թագավորը պատրաստ է մի քաղաք ընծայել որդուն բուժողին. «Էտ լուվոթունը վրեր տու ինձ ըրալ ըս, քզեսե օգած տրեղըտ մին քաղաք ըմ շիննական, ասա տրեսնամ հի՛նչ տրեղ ըս օգում»<sup>9</sup>:

Թագավորի աղջկան բուժելու դեպքում բուժողը կարող է ստանալ նաև աղջկա ձեռքը, նույնիսկ դառնալ թագավորության ժառանգորդ. «Վեր կրացիր վեչ իմ ըխճըկանը պժշկես, ես վրոշում օնեմ, քու կլոխտ կտրելու վեն... վեր ախճիկս լըվացալ, տալու վեմ քեզ, իմ փեսան կըտատնաս, իմ մոնիլան ետը նել իմ տեղը կնստես թաքավերոթուն կանես»<sup>10</sup>:

Մի թագավոր իր մինուճար համր աղջկան բուժել չկարողացողների («հաքյիմ, գյիդացող, դերվիշ, փալչի») գլուխները կտրում, կույտ է անում. «Էտ քըղաքեն մաչտրեղը մին խիլլա մարթու կըլխընե կըտորած, տարսած, մին զրեռ սար շինած»<sup>11</sup>: Այլ հեքիաթում թագավորը ի ծնե անդամալույծ տղային բուժել չկարողանալու համար բազմաթիվ բժիշկների, փիլիսոփաների, գուշակների, հեքիմների գլուխները կտրում, շարում է «հասարին» (ցանկապատ): Մի օտար, իմաստուն բժիշկ ասում է, որ տղան անբուժելի է, և թագավորի գլուխը պետք էր կտրել՝ այսքան անմեղ գոհերի, «Էսքան մարդու կյանքին վայիս» լինելու համար<sup>12</sup>:

Չբուժելու համար բժշկին պատժելու երևույթը գալիս է հնագույն ժամանակներից: Դեռևս Համուրապիի (մ. թ. ա. XVIII) օրոք Բաբելոնում օրենք կար՝ հասարակ մարդկանց վնասելու դեպքում բժշկին տուգանել, հայտնի մարդու դեպքում՝ կտրել ձեռքը, իսկ նրա որդուն սպանելու դեպքում սպանում էին բժշկի որդուն<sup>13</sup>:

Հայ բժշկության պատմության ամենաականավոր դեմքերից մեկը՝ Ամիրդովլաթ Ամասիացին, այսպես է բնորոշում բժշկի մասնագիտության դերն ու նշանակությունը. թագավորները և մեծավորներն իրենց մոտ միշտ մի իմաստուն բժշկի են պահում, որ պետք եղած ժամանակ չգնան փնտրեն կամ ուրիշ տեղից բերեն: Բժիշկը պիտի հետևի թագավորին, գննի նրա ուտելիքը, խմելիքը, հագուստները, որ թունավորված չլինեն, «այնոր համար, որ թագավորաց և մեծունաց չարկամն շատ է»<sup>14</sup>: Թունավորելու դեպքում՝ հակաթույն կա՝ այլ դեղ դրա

<sup>6</sup> Գ. Ս ը վ ա ն ձ տ յ ա ն. Երկեր, հ. 1, Երևան, 1978, էջ 488:

<sup>7</sup> ՀՏՀ, հ. III, Երևան, 1962, էջ 207–208:

<sup>8</sup> ՀՏՀ, հ. IV, Երևան, 1963, էջ 424:

<sup>9</sup> ՀՏՀ, հ. VII, Երևան, 1979, էջ 517:

<sup>10</sup> Նույն տեղում, էջ 511:

<sup>11</sup> ՀՏՀ, հ. VI, Երևան, 1973, էջ 103:

<sup>12</sup> Թ. Գ և ը ը յ ա ն. Լոռի. – Հայ ազգագրություն և բանասիրություն (այսուհետև՝ ՀԱԲ), հ. 20, Երևան, 1999, էջ 117–118:

<sup>13</sup> Э. К в е р а. Они писали на глине. М., 1984, с. 79.

<sup>14</sup> Ա մ ի ը տ ն վ լ յ թ Ա մ ա ս ի ա գ ի. Օգուտ բժշկության, Երևան, 1940, էջ 17–18:

դեմ: Այս ամենի պատճառով էլ մեծ է բժշկի պատիվը. «այլ մարդիկ զայս փառս չունին, որ բժիշկն ունի»<sup>15</sup>: Նա իշխանություն ունի թագավորի ընտանիքում, ծածուկ ցավերն էլ է իմանում, «Եւ պատեհ է, որ բժիշկն զէտ խոստովանահայր լինի և զամէն ծածուկ խորհուրդն պահէ: Թէ բժիշկն այսպէս չի լինի՝ ինքն չէ բժիշկ»<sup>16</sup>: Ոչ միայն զաղտնապահ, այլև ծանր պահի իրեն, լինի ուսման տեր, ձեռքը բարի, ոտքը թեթև, որ օգտակար լինի հիվանդին: Իսկ եթե ոտքը ծանր լինի, ձեռքը ոչ թեթև, ինչքան էլ ուսում ունենա, օգուտ չի տա<sup>17</sup>:

Ինքը՝ Ամիրդովլաթը ծառայել է Կ. Պոլսի արքունի պալատում, բայց հետո ինչ-ինչ պատճառներով (հնարավոր է բժշկության որևէ անհաջող դեպքի) հեռացել է այլ երկիր<sup>18</sup>: Նա բավական փոթորկահոյզ կյանք է ապրել, դժվարություններ քաշել այլազգիների, անօրենների, դատավորների, թագավորների ու իշխանների ձեռքից, շատ բան տեսել կյանքում. «և շատ դարիպություն էի քաշել, և զժամանակի զչարն ու զբարին և զպատահմունքն էի կրել, զհարստություն և զաղքատություն էի քաշել, և ի յերկրէ ի յերկիր շատ բժշկութեան արուեստն էի գործել..., և շատ ծառայել էի հիւանդաց, և մեծամեծաց, և իշխանաց, և հազարապետաց, և հարիւրապետաց, և քաղաքացոց, և աղքատաց, մեծի և փոքրու, և շատ չար ու բարի էի տեսել, և հանց եղա ես հիմայ, որ ոչ հարստութեան կու խնդամ և ոչ աղքատութեան կու տրտմիմ, և զամէն չարն ու բարին մէկ կու տեսնում, և անհոգել եմ այս ամէն ցանկութենէն կենցաղոյս»<sup>19</sup>: Այս ամենը կարող էին ասվել հոչակ և անուն վաստակած ցանկացած բժշկի կողմից, քանի որ նման կենսաձևն արդյունք է նրա մասնագիտական գործունեության և ժամանակի հանրային ու բարոյական հարաբերությունների:

Շեքիաթներում նա, ինչպես իրական կյանքում, անվճար բուժումների («առանց փարա») դեպքեր են հանդիպում<sup>20</sup>:

Շեքիաթներում բժիշկը մեծ մասամբ անկախ անձ է, որ շատ անգամ բուժումներ իրականացնելու համար ստիպված է լինում շրջիկ արհեստավորի նման տեղից տեղ թափառել<sup>21</sup>, նա կարող է լինել նաև պալատական բժիշկ և բնակվել պալատում<sup>22</sup>: Արցախյան հեքիաթներից մեկում Լողմանի անունով է կոչվում Մելիք-Շահնազարի բժիշկը, որը հայտնի էր ամեն տեսակ հիվանդություններ բուժելու հմտությամբ: Մի ծանր հիվանդ մարդու բուժելու համար հարկ է լինում Մելիք-Շահնազարից թույլտվություն ստանալ<sup>23</sup>, որը ցույց է տալիս բժշկի ոչ անկախ կարգավիճակը (հմմտ. Շերողոտի վերը բերված վկայությունը բժշկին պալատում բռնի պահելու մասին):

<sup>15</sup> Նույն տեղում, էջ 18-19:

<sup>16</sup> Նույն տեղում:

<sup>17</sup> Նույն տեղում, էջ 19:

<sup>18</sup> Մ տ. Մ ա լ ի ս ա յ ա ն ց. Առաջաբան.– Մ մ ի ր տ ո Վ լ ա թ Ս մ ա ս ի ա ց ի. Օգուտ բժշկության, էջ Բ-Ը:

<sup>19</sup> Նույն տեղում, էջ 7:

<sup>20</sup> ՀՏՀ, հ. IX, Երևան, 1968, էջ 565:

<sup>21</sup> ՀՏՀ, հ. XII, Երևան, 1984, էջ 613:

<sup>22</sup> Մ. Զ է յ թ լ յ ա ն. Մուսա լեռան ժողովրդական հեքիաթներ, Բեյրութ, 1973, էջ 70:

<sup>23</sup> Ա. Ղ ա զ ի յ ա ն. Արցախ.– ՀԱԲ, հ. 15, Երևան, 1983, էջ 130:

Բժիշկների մեջ էլ կան հարուստներ ու աղքատներ: Եվ դա միշտ չէ, որ կապ ունի նրա մասնագիտական ունակությունների, հմտության, իմաստության հետ, այլ, անշուշտ, պայմանավորված է նրանով, թե ի՞նչ շրջանակների հետ են բժշկի շփումները, ի՞նչ միջավայրում է գործում, ինչ երկրում է ապրում: Եվ սա շնորհված է ճակատագրով: Ուստի հարուստ կամ աղքատ լինելը, ըստ ժողովրդական մտածողության, բախտի, նախախնամության որոշումն է:

«Լողմանին նան չոբանը» հեքիաթում<sup>24</sup> Լողմանին իմաստուն է, ամեն ինչ գիտի, նան հարուստ է, միշտ իր ծառայությունից տուն է վերադառնում լիքը բեռներով, ձի է վարձում, որ տանի իրեն ու բեռները: Մի օր ճանապարհին նա հանդիպում է մի չոբանի, և նրանք վեճի են բռնվում, թե չոբանի կովը, որ ծնելու է, ինչպիսի՞ն է լինելու հորթը: Լողմանին պնդում է, որ հորթի ճակատին սպիտակ նշան պիտի լինի՝ մոր նման: Չոբանն էլ պնդում է, որ պոչն է սպիտակ, ինչպես հորը, միայն այդ պոչը ետևից ծալվել է ու դրվել ճակատին (երկուսն էլ ներսը տեսնելու խորթափանցություն ունեն): Ի վերջո, գրագ են գալիս, մորթում կովը և տեսնում, որ ճիշտը չոբանն էր: Այստեղ Լողմանին զարմանում է. «Ես շատ կարթած, աշխարք տրեսած մարթ ըմ, պենան տուս ա կյամ, վրեր տու ինձանա յէլ ըս շատ գյուղում, էտ հունց ա, վրեր տու չոբան մարդ, էս լողմանի, տու գլի-դացեր, էս՝ չէ»: Չոբանը բացատրում է դա նախախնամությամբ. «...էն վախտը, վրեր էս ու տու մորա իլալ ընք, մին պարի սհաթ ա իլալ, մին իմաստուն սհաթ, ամմա տու ինիլիս վախտը վրեխճարն ուրան տիմակն ա լուզ տուվալ, իմ ինիլիս վախտը վրեխճարն ուրան վրեննավը ուրան պոզն ա քորալ, իմ փայրս վրեսկուռն ա ինզալ, քունը՝ տիմակը նան եղը, տրա հետե յէլ էս չըրչըրվելավ, քյասիք պիտի ապրեմ, տու՝ համ դինջ, համ հարուստ»<sup>25</sup>:

Բժիշկները, որոնք ծագում են տարբեր խավերից և ոչ հազվադեպ՝ ստորին, աղքատ խավից, հաճախ իրենց հմուտ բուժումներով մեծ հռչակի են հասնում, փառքի արժանանում, նյութական բարեկեցություն ձեռք բերում, բարձրացնում իրենց կարգավիճակը: Սակայն հանուն շահի սխալ է փորձել բուժել անհույս հիվանդին, դրանով կասկածի տակ դնելով բժշկի վարկը: Եվ բժիշկը չպետք է լինի ազահ և փող չպահանջի աղքատներից<sup>26</sup>: Այս վերջին միտքը հստակ ձևակերպված է բժիշկների բարոյական վարքագրում (կողեքս)՝ Հիպոկրատի երդման մեջ (եթե պետք է՝ ձրի բուժիր, եթե մարդը միջոց չունի կամ օտարական է)<sup>27</sup>:

<sup>24</sup> ՀԺՀ, հ. VII, № 46:

<sup>25</sup> Նույն տեղում, էջ 168: Հարուստ-աղքատ հակադրության մասին այս մտտիվը գործում է նաև իմաստուն-իշխանավոր հակադրության համատեքստում: Երկու դեպքում էլ դրանք վերաճում են կամ արժանիք, կամ բախտ երկրնտրանքին: Երբ մի օր թագավորը Խիկար իմաստունին հարցնում է, թե ինչպե՞ս է, որ «խելքով լիք մարդիկ գանձով դարդակ են լինում: Օրինակ դու, իմաստուն էս ու աղքատ», Խիկար իմաստունը պատասխանում է. «Դա բաղդի բան է, թագավոր... և դրա մեջ մեղավորը աստղն է... Այդ նրանից է, որ գիտուն, իմաստուն մարդի ծնվելու բույսին նրա բաղդի աստղը այժի չոր պոզի վրա է ընկել, իսկ թագավոր մարդի ծնվելու բույսին նրա բաղդի աստղը ոչխարի տխլիկ դմակի վրա: Այդ պատճառով ինձպեսները աղքատ ու դարդակ են գանձի կողմից, ինչպես այժի չոր պոզը, իսկ թեգպեսները հարուստ ու լիքն են ինչպես ոչխարի փափուկ դմակը» (Ս. Ք ա մ ա լ է ա ն ց. Օերերի գրոյցներից, Թիֆլիս. 1911, էջ 4-5):

<sup>26</sup> Ա մ ի թ տ ո վ լ ա թ Ա մ ա ս ի ա ց ի. Օգուտ բժշկության, էջ 18:

<sup>27</sup> В. Д ю р а н т. Жизнь Греции. М., 1997, с. 355.

Բժշկությունն սովորելիս ոչ միշտ է հաշվի առնվում մարդու բարոյական նկարագիրը: Մակայն բժիշկ դառնալով, մարդը պարտավոր է ենթարկվել բարոյական որոշակի չափանիշերի: Այդ չափանիշերն առաջին անգամ մանրամասնորեն ու համակարգված իրենց արտացոլումը գտան Հիպոկրատի օրոք՝ երդման տեսքով, որը հանդիսավոր կերպով արտաբերելով՝ բժիշկը պարտավոր էր հավատարիմ մնալ դրան իր մասնագիտական ողջ գործունեության ընթացքում: Բժշկի բարոյական այս պատվիրանները դարեր ի վեր ուղեկցել են այդ մասնագիտության հետևորդներին:

Հեքիաթում բուժողը հիմնականում բարոյական բարձր նկարագիր ունի: Երբ հեքիմությունն իմացող քարվանքաշին (քարավանապետ) բուժում է թագավորի՝ օձի կծածից ուռած որդուն, վերջինս ուզում է վարձահատույց լինել նրան իր մոտ ունեցած մի խուրջին ոսկով, սակայն նա չի վերցնում, ասելով, որ տղան ջահել է, թող իր համար ծախսի<sup>28</sup>: Մակայն որոշ դեպքերում բուժողները հանուն փողի պատրաստ են վաճառել իրենց խիղճը, վնաս պատճառել մարդկանց կամ դառնալ չար գործարքների մեղսակիցը՝ արատավորելով մասնագիտական պատիվը:

Հին ժամանակներում միմյանց շարքից հանելու ամենամատչելի միջոցը թույների գործածությունն էր: Չանագան ժողովուրդների պատմության էջերը լի են նման դեպքերով: Այդ պատճառով էլ մեծամեծների ու հարուստների անձնական բժիշկները ամենուր ուղեկցել են նրանց՝ հետևելու սննդին ու կանխելու թունավորման դեպքերը<sup>29</sup>: Հեքիաթներում էլ հանդիպում են թունավորելու դեպքեր: «Դեղ» բառն օգտագործվել է նաև թույնի իմաստով: Թույներն անվանվել են դեղեր, թունավորելը՝ դեղել<sup>30</sup>: Մայրը թունավորել է որդուն, քույրը՝ եղբորը, խորթ մայրը՝ աղջկան, օգտագործելով զանազան թունավոր ուտելիքներ՝ դևի գերեզմանից բերած հող<sup>31</sup>, դևի պոչից սարքած ճաշ և այլն: Թույները խառնել են թեյին կամ ուտելիքին<sup>32</sup>: Որոշ դեպքերում նշվում է դեղի հեղինակը. նա բժիշկ է՝ հիպոկրատյան բարոյականությունից հեռու, չար կախարդի գործառույթներ իրականացնող մի կերպար: Այսպես՝ թագուհին սիրահարվում է «ցիգանի տղին», բժշկից դեղ բերում, տալիս ամուսնուն, որից նա կամաց-կամաց շարքից դուրս է գալիս<sup>33</sup>: Ամուսնուն հավատարիմ կինը բժիշկներից լավ գումարով դեղ (թույն) է գնում, որ էթե չկարողանա իրեն հետապնդող թագավորից ազատվել՝ խմի և մեռնի<sup>34</sup>: Սա այն դեպքն է, երբ նպատակն արդարացնում է միջոցը:

Ի վերջո, բոլոր քնաբեր, թմրեցնող նյութերն ու դեղերն էլ բուժողների, դեղագործների (հնում դրանք նույն մարդն էր) ձեռքի գործ են, որ շատ դեպքերում կի-

<sup>28</sup> «Ազգագրական հանդես» (այսուհետև՝ ԱՀ), գ. 24, Շուշի-Թիֆլիս, 1913, էջ 170:

<sup>29</sup> Ա մ ի ր տ ո վ լ ա թ Ա մ ա ս ի ա ց ի. Օգուտ բժշկության, էջ 18:

<sup>30</sup> ՀՏՀ, հ. VIII, Երևան, 1977, էջ 376, հ. X, Երևան, 1967, էջ 45:

<sup>31</sup> ՀՏՀ, հ. XV, Երևան, 1998, էջ 407:

<sup>32</sup> ՀՏՀ, հ. VIII, էջ 376:

<sup>33</sup> ՀՏՀ, հ. VI, էջ 504:

<sup>34</sup> Թ. Գ և ռ ր յ ա ն. Լոռի, ՀԱԲ, հ. 20, էջ 58:

բառվում են ոչ բարի նպատակներով՝ վնասելու, գողության, փսխեցնելու, առևանգման կամ մեկի գլխին խաղ խաղալու նպատակներով<sup>35</sup>:

Հեքիաթի բժիշկը երբեմն գործում է՝ տուրք տարով հերոսների ցանկություններին, խախտելով բժշկի բարոյական սկզբունքը՝ մի՛ վնասիր<sup>36</sup>: Բժշկի անձը հաճախ չի երևում, նա ընդամենը կատարող է, իսկ արածի հետևանքների համար պատասխանատվություն զգալու մասին ակնարկ անգամ չկա: Այսպես, հավատարիմ ամուսինը, որը երդվել էր սիրելի կնոջ մահից հետո կյանքում չմերձենալ այլ կնոջ, որի անհուտրեն ծանր հիվանդ ժամանակ խոստումը պահած լինելու համար գնում է բժշկի մոտ և ամորձատել տալիս իրեն<sup>37</sup> կամ բժշկի տված դեղերով զրկում է իրեն առնականությունից<sup>38</sup>, մինչդեռ կինն անսպասելիորեն բուժվում է և պահանջում, որ այդուհետև ամուսինը հանդուրժի սիրելեանի գոյությունը:

Հեքիմն օգնում է հերոսին ոսկերչի կնոջը տիրանալու գործում, մեկ ոսկու դիմաց նրան այնպիսի դեղեր տալով, որոնց շնորհիվ տղան գունատ, ուժասպառ է երևում և հիվանդության պատրվակով մուտք գործում ոսկերչի տուն՝ այնտեղ խնամվելու համար և այդպես կարողանում հասնել սրտի ուզածին<sup>39</sup>:

Հեքիմը երբեմն չի երկնչում նաև անազնիվ այլ գործարքներից, եթե դրա դիմաց իրեն լավ վճարում են. հիվանդ ձևացող թագուհու մոտ հեքիմ են բերում, թագուհին նրան առատ ոսկի է խոստանում, եթե նա թագավորին ասի, որ իբրև իրեն բուժվելու համար հարկավոր է տաք ջրերն ուղարկել մի հավատարիմ մարդու հետ, մինչդեռ դա առիթ էր՝ սիրելեանի հետ առանձնության մեջ լինելու համար<sup>40</sup>:

Բժիշկը, ի վերջո, զերծ չէ նաև մարդկային այլ արատներից, որոնց տրվելով՝ ի չարս է գործադրում իր մասնագիտական ունակությունները: Մի հեքիաթում Լոռյմանին ռանչաբարի իմաստուն երեխային հանդիպելով, վախենում է, որ երբ նա մեծանա, կկտրի իր հացը: Նրանից ազատվելու համար նա թագավորի հիվանդ որդուն որպես բուժման միակ միջոց՝ առաջարկում է այդ տղայի սիրտն ու պլոճիկներն ուտել<sup>41</sup>: Հնում եղել է այդ հավատալիքը, որ ուտելով գոհի մարմինը, տիրանում էին նրա գորավոր հատկություններին: Տվյալ դեպքում հին ու նոր սերունդների հակամարտության խնդիրն է, հեքիաթում հինը պայքարելով նորի

<sup>35</sup> ՀԺՀ, հ. V, Երևան, 1966, էջ 182, 336, 631, հ. VIII, էջ 556, հ. XV, էջ 62, ԱՀ, գ 23, Շուշի-Թիֆլիս, էջ 189:

<sup>36</sup> Հնուց ի վեր որոշ ժողովուրդներ ունեցել են բժշկական էթիկայի բավական մշակված համակարգ և պատիժներ սահմանել դրանց խախտումների դեպքում (Ս. Վ ա ր դ ա ն յ ա ն. Հայաստանի բժշկության պատմություն, Երևան, 2000, էջ 23): Միջնադարյան Հայաստանում ևս իրավական որոշակի չափանիշներ են մշակվել Գոշի և Սմբատ Սպարապետի Դատաստանագրքերում, որոնց համաձայն բժշկի նենգ չարամտությամբ վնաս հասցնելը քրեական հանցանք է համարվել (տե՛ս Ա. Կ ծ ո յ ա ն. Բժշկագիտությունը Հայաստանում, XI–XIV դ., Երևան, 1968, էջ 52):

<sup>37</sup> ՀԺՀ, հ. VI, էջ 216:

<sup>38</sup> ՀԺՀ, հ. XIII, Երևան, 1985, էջ 352:

<sup>39</sup> ՀԺՀ, հ. IV, էջ 267:

<sup>40</sup> ՀԺՀ, հ. VI, էջ 243:

<sup>41</sup> ՀԺՀ, հ. IV, էջ 128:

դեմ, նրան փորձությունների է մղում, որոնց հաղթահարումով նորն անցնում է նվիրագործության՝ իր համար սահմանված ուղին:

Մի հեքիաթում Լոդմանին չի կարողանում հանդուրժել ֆիզիկապես առողջ, ուժեղ մարդու դրսևորած արհամարհական վերաբերմունքն իր հանդեպ, ապարդյուն սպասելով մի օր նրա հիվանդանալուն: Ի վերջո, նա այդ մարդու կնոջից իմանում է նրա ամուր առողջության գաղտնիքը. բացի ողջ օրը բնության գրկում կատարած ֆիզիկական անդուլ աշխատանքից, նա նաև պահպանում է սննդակարգի ճիշտ կանոնները՝ ուտում է միևնույն ժամերին և ուտելիքները չի խառնում իրար: Լոդմանին փող է տալիս այդ մարդու կնոջը, որ նա խանգարի ամուսնու սննդակարգը՝ ժամերն ու կերակուրների տեսականին: Արդյունքում մարդը հիվանդանում է և ստիպված լինում գնալ Լոդմանի մոտ, մեղա գալ իր պահվածքի համար<sup>42</sup>:

Նշենք, որ բժշկությունը հնում դասվել է արհեստների թվին, իսկ արհեստավորների միջև մրցակցությունը տարածված երևույթ էր ոչ միան միևնույն արհեստի շրջանակներում, այլև տարբեր արհեստների: Այդպիսի մրցակցություն է հիշեցնում որոշ դիպաշարերում միջանկյալ պատմությունների ձևով արվող հեքիաթ-հանելուկների շարքը, որոնցից մեկը պատմում է նույն աղջկան սիրահարված երեք ընկերների կամ եղբայրների մասին: Աղջիկը ճիշտ ընտրություն կատարելու համար նրանց ուղարկում է արհեստներ սովորելու (մեկ տարբերակում աղջիկը չկա, թագավոր հայրն է որդիներին ուղարկում արհեստներ սովորելու, որ հետո ըստ նրանց արժանիքների որոշի՝ ում է թողնելու թագավորությունը<sup>43</sup>): Մեկը դառնում է հեքիմ, մեկը՝ գուշակ կամ աստղաբաշխ, կամ իմաստուն (այսինքն՝ ամեն ինչ իմացող, պայծառատես) և կամ կախարդական հայելի է ձեռք բերում ու դրա մեջ տեսնում աշխարհում կատարվող ամեն ինչ: Երրորդը արագ տեղաշարժվելու ունակությամբ է օժտված՝ նա կամ արագավազ է, կամ ձեռք է բերել կախարդական թռչող գորգ: Մեկ տարի անց ընկերները կամ եղբայրները հանդիպում են պայմանավորված տեղում: Գուշակն իմանում է (կամ հայելու մեջ տեսնում է), որ աղջիկը ծանր հիվանդ է, մահվան շեմին: Հեքիմն ասում է, որ ունի բուժման միջոցը, իսկ վագորդն ասնում է դեղն ու արագ տեղ հասցնում և փրկում աղջկան: Այժմ հարց է ծագում՝ ո՞ւմ շնորհիվ փրկվեց աղջիկը և այժմ նա ո՞ւմ պիտի հասնի: Երեք տարբերակներում առավելությունը տրվում է դեղը բերողին<sup>44</sup>: Մեկ տարբերակում առավելությունը հեքիմին է տրվում, քանի որ աղջիկն ընդունել-վերջացրել է նրա դեղը՝ անմահական խնձորը և միայն նրա հետ ամուսնությամբ կարող է հաստուցել դրա դիմաց<sup>45</sup>: Մեկ այլ տարբերակում աղջիկը նրանց միջև տարբերություն չդնելու համար նրանց երեքին էլ դարձնում է իր եղբայրները, քանի որ յուրաքանչյուրի կատարածն էլ իր

<sup>42</sup> Ա. Ղ ա գ ի յ ա ն, Ս. Վ ա ր դ ա ն յ ա ն. Բաբլի հայոց բանահյուսությունը, Երևան, 2004, էջ 156-158:

<sup>43</sup> ՀԺՀ, հ. XI, Երևան, 1980, էջ 215:

<sup>44</sup> ՀԺՀ, հ. IX, էջ 508, հ. XI, 15 215, Ռ. Հ. Գ ր ի գ ո թ յ ա ն. Գեղարքունիք. - ՀԱԲ, հ. 14, Երևան, 1983, էջ 104:

<sup>45</sup> ՀԺՀ, հ. V, էջ 332:



կյանքը փրկելու հարցում հավասարապես կարևոր էր և առանց մեկի՝ մյուսի արածն էլ արդյունք չէր տա, ուստի բոլոր «մասնագիտություններն» էլ պետք են ու անհրաժեշտ՝ ամեն մեկն իր տեղում<sup>46</sup>:

Բուժողը հայկական հեքիաթներում հանդես եկող մասնագիտական ուղղվածություն ունեցող կերպարներից ամենահաճախ հանդիպողն է: Նման այլ կերպարների հետ համեմատությունն առավելությունը տալիս է բժշկին ոչ միայն քանակական վիճակագրությամբ, այլև մասնագիտական կարևորության առումներով: Բուժողների առանձին տեսակներ՝ բժիշկ, հեքիմ, գուշակ, դերվիշ, տատմեր և այլն, տարբերվում են գործունեության իրենց բնորոշ գործառույթներով և ոլորտներով:

Այսպիսով՝ հեքիաթի բուժողներն էլ, ինչպես իրականության մեջ է եղել, լինում են անճարակ ու հմուտ, աղքատ ու հարուստ: Նրանք անհաջողության դեպքում ենթարկել են իրենց վտանգների, հաջող ելքի դեպքում տիրացել փառքի ու մեծ պատիվների: Նրանք հիմնականում հավատարիմ են մնացել բժշկի մասնագիտական կոչման պարտավորեցնող բարոյական վարքագրին, բայց հաճախ հանուն շահի մեղանչել են և խախտել «մի՛ վնասիր» պատվիրանը:

## ОБРАЗ ЛЕКАРЯ В АРМЯНСКИХ СКАЗКАХ

ЕВА ЗАКАРЯН

Р е з ю м е

Лекари в армянских сказках встречаются чаще, чем другие профессии, они наиболее значительны и уважаемы. Как и в действительности лекари в сказках бывают и бездарные, и умелые, честные и шарлатаны, бедные и богатые. Общаясь со всеми слоями общества, они часто подвергались опасностям, иногда становились богатыми и прославленными. В основном лекари оставались верными кодексу профессиональной этики, но иногда из-за корысти нарушали заповедь врача “не навреди” и поступали аморально.

## THE IMAGE OF CURER IN ARMENIAN FOLK-TALES

EVA ZAKARYAN

S u m m a r y

The curers in Armenian folk-tales are met more frequently and are the most important images in comparison with other persons. As in reality, due to their profession, they associate with other social groups. The curers can be skillful or clumsy, poor or rich. In case of misfortune they're exposed to dangers, but in case of good luck they can win fame and become wealthy. In general, they are faithful to their professional mission, but sometimes their individual interest may violate the law and they act immorally.

<sup>46</sup> ՀԺՀ, հ. XIV, Երևան, 1999, էջ 278: